

JESOSY IRERY IHANY

"Fa ny Mpananatra, dia ny Fanahy Masina, Izay irahin'ny Ray amin'ny anarako, Izy no hampianatra anareo ny zavatra rehetra sy hampahatsiaro anareo ny zavatra rehetra izay nolazaiko taminareo." Jaona 14.26

Eo amin'ny Fiagonana kristianina dia misy vanim-potona telo lehibe izay ankalazaina : voalohany dia ny Krismasy na Noely, ny faharoa dia ny Paska ary ny fahatelo farany dia ny Pentekosta, izay hankalazaintsika amin'izao.

Tsy tongatonga ho azy ireo vanim-potoana telo lehibe ireo fa azo ambara fa tena planin'Andriamanitra izay mifandrify indrindra amin'ny asa lehibe nataony ho famonjena ny olombelona.

Taratra teo amin'ny vanim-potoana ny krismasy fa ny Ray no naniraka ny Zanany lahy tokana, ka nahafoy ny sarobidy indrindra teo Aminy, hanehoany ny fara-tampony amin'ny fitiavany (Jao.3 :16).

Teo amin'ny vanim-potoana ny Paska, dia ny fitiavan-dehibe tamin'ny nanoloran'i Jesosy Kristy ny Tena aman-dRàny, nisolo ny mpanota rehetra ka hanolorany famelan-keloka ho an'izay rehetra mino Azy. Nahafoy ny aina manontolo Izy mba ho fanavotana antsika (Efes 5 :2 ; Heb 2 :17).

Amin'izao vanim-potoanan'ny Pentekosta izao kosa dia tsahivina ny nidinan'ny Fanahy Masina, tonga nirahin'ny Ray sy ny Zanaka, hitari-dàlana ny olona ho amin'ny marina rehetra, dia ny amin'ny finoana an'i Jesosy Kristy, llay ivon'ny asa lehibe nataon'Andriamanitra. (Jao.14 :6) Noho izany, ireo vanim-potona telo lehibe ireo dia maneho sy manambara amintsika ny amin'ny «**TRINITE**», Ireo Persona telo samihafa, nefo mikendry zavatra tokana dia ny famonjena ny olona mpanota izay very, ka mba hanany sy handovany fiaianana mandrakizay, ary efa miatomboka amin'izao fiaianana izao sahadys.

Ny andro Pentekosta no asa farany ataoan'Andriamanitra, ka izay manota amin'ny Fanahy Masina dia tsy misy famelan-keloka ho azy mandrakizay (Marka 3 :29), izany hoe mandà ny asany, izay mampihaiky heloka ny mpanota hibebahany ka hialàny amin'ny fahotana sy mandresy lahatra azy mba hino an'i Jesosy, handraisany famelan-keloka sy fanamarinana eo anatrehan'Andriamanitra.

Écrit par Pasteur

Vendredi, 13 Mai 2016 17:09 - Mis à jour Vendredi, 13 Mai 2016 20:04

Farany, ireto ny hafatra hosaintsainintsika mpino amin'izao andro farany izao :

1- "Aza manao izay mampalahelo ny Fanahy Masina" (Efs.4 :30),

2- "Aza mamono ny Fanahy Masina "(1 Tes.5 :19),

3- Dia mba ho toy ireo virjina dimy hendry nitandrina sy nikolokolo ny fanaovan-jirony sy ny afony (Mat. 25 :13).

Hoan'Andriamanitra irery anie ny Voninahitra